0.0.1 kosambiyasuttam

- 1. evam me sutam: ekam samayam bhagavā kosambiyam viharati ghositārāme. tena kho samayena kosambiyam bhikkhū bhandanajātā kalahajātā vivādāpannā añnamañnam mukhasattīhi vitudantā viharanti. te na ceva añnamañnam sañnapenti, na ca sañnattim upenti, na ca añnamañnam nijjhāpenti, na ca nijjhattim upenti.
- 2. atha kho aññataro bhikkhu yena bhagavā tenupa-saṅkami. upasaṅkamitvā bhagavantaṃ abhivādetvā ekamantaṃ nisīdi. ekamantaṃ nisinno kho so bhik-khu bhagavantaṃ etadavoca: idha bhante kosambi-yaṃ bhikkhū bhaṇḍanajātā kalahajātā vivādāpannā aññamaññaṃ mukhasattīhi vitudantā viharanti. te na ceva aññamaññaṃ saññāpenti, na ca saññattiṃ upenti, na ca aññamaññaṃ nijjhāpenti, na ca nijjhattiṃ upentītii.
- 3. atha kho bhagavā aññataraṃ bhikkhuṃ āmantesi: ehi tvaṃ bhikkhu mama vacanena te bhikkhū āmantehi 'satthāyasmante āmantetī'ti. evambhanteti kho so bhikkhu bhagavato paṭissutvā yena te bhikkhū tenupasaṅkami. upasaṅkamitvā te bhikkhū etadavoca: satthā āyasmante āmantetīti. evamāvusoti kho te bhikkhū tassa bhikkhuno paṭissutvā yena bhagavā tenupasaṅkamiṃsu. upasaṅkamitvā bhagavantaṃ abhivādetvā ekamantaṃ nisīdiṃsu. ekamantaṃ nisinne kho

te bhikkhū bhagavā etadavoca: saccaṃ kira tumhe bhikkhave bhaṇḍanajātā kalahajātā vivādāpannā añ-ñamaññaṃ mukhasattīhi vitudantā viharatha, te na ceva aññamaññaṃ saññāpetha, na ca saññattiṃ upetha, te na'ceva aññamaññaṃ nijjhāpetha, na ca nij-jhattiṃ upethāti. " evambhante".

- 4. taṃ kiṃ maññatha bhikkhave yasmiṃ tumhe samaye bhaṇḍanajātā kalahajātā vivādāpannā aññamaññaṃ mukhasattīhi vitudantā viharatha, api nu tumhākaṃ tasmiṃ samaye mettaṃ kāyakammaṃ paccupaṭṭhitaṃ hoti sabrahmacārīsu āvī ceva raho ca, mettaṃ vacīkammaṃ paccupaṭṭhitaṃ hoti sabrahmacārīsu āvī ceva raho ca, mettaṃ manokammaṃ paccupaṭṭhitaṃ hoti sabrahmacārīsu āvī ceva raho cāti ' no hetambhante'.
- 5. iti kira bhikkhave yasmim tumhe bhandanajātā kalahajātā vivādāpannā aññamaññam mukhasattīhi vitudantā viharatha, neva tumhākam tasmim samaye mettam kāyakammam paccupaṭṭhitam hoti sabrahmacārīsu āvī ceva raho ca. na mettam vacīkammam paccupaṭṭhitam hoti sabrahmacārīsu āvī ceva raho ca. na mettam manokammam paccupaṭṭhitam hoti sabrahmacārīsu āvī ceva raho ca. atha kim carahi tumhe moghapurisā kim jānantā kim passantā bhandanajātā kalahajātā vivādāpannā aññamaññam mukhasattīhi vitudantā viharatha, te na ceva aññamaññam saññāpetha,

bjt page 754

na ca saññattim upetha, na ca aññamaññam nijjhāpetha, na ca nijjhattim upetha. tam hi tumhākam moghapurisā bhavissati dīgharattam ahitāya dukkhāyāti.

- **6.** atha kho bhagavā bhikkhū āmantesi: chayime bhikkhave dhammā sārāṇīyā piyakaraṇā garukaraṇā saṅgahāya avivādāya sāmaggiyā ekībhāvāya saṃvattanti. katame cha?
- 7. idha bhikkhave bhikkhuno mettam kāyakammam paccupaṭṭhitam hoti sabrahmacārīsu āvī ceva raho ca. ayampi dhammo sārānīyo piyakarano garukarano sangahāya avivādāya sāmaggiyā ekībhāvāya samvattati.
- 8. puna ca param bhikkhave bhikkhuno mettam vacīkammam paccupaṭṭhitam hoti sabrahmacārīsu āvī ceva raho ca. ayampi dhammo sārānīyo piyakarano garukarano saṅgahāya avivādāya sāmaggiyā ekībhāvāva samvattati.
- 9. puna ca param bhikkhave bhikkhuno mettam manokammam paccupatthitam hoti sabrahmacārīsu āvī ceva raho ca. ayampi dhammo sārānīyo piyakarano garukarano sangahāya avivādāya sāmaggiyā ekībhāvāya samvattati.

- 10. puna ca param bhikkhave bhikkhu ye te lābhā dhammikā dhammaladdhā antamaso pattapariyāpannamattampi, tathārūpehi lābhehi appaṭivibhattabhogī hoti sīlavantehi sabrahmacārīhi sādhāraṇa bhogī. ayampi dhammo sārāṇīyo piyakaraṇo garukaraṇo saṅgahāya avivādāya sāmaggiyā ekībhāvāya saṃvattati.
- 11. puna ca param bhikkhave bhikkhu yāni tāni sīlāni akhaṇḍāni acchiddāni asabalāni akammāsāni bhujissāni viñnuppasatthāni aparāmaṭṭhāni samādhisamvattanikāni, tathārūpesu sīlesu sīlasāmañnagato viharati sabrahmacārīhi āvī ceva raho ca. ayampi dhammo sārāṇīyo piyakaraṇo garukaraṇo saṅgahāya avivādāya sāmaggiyā ekībhāvāya saṃvattati.
- 12. puna ca param bhikkhave bhikkhu yāyam diṭṭhi ariyā niyyānikā niyyāti takkarassa sammā dukkhakkhayāya, tathārūpāya diṭṭhiyā diṭṭhisāmaññagato viharati sabrahmacārīhi āvī ceva raho ca. ayampi dhammo sārāṇīyo piyakaraṇo garukaraṇo saṅgahāya avivādāya sāmaggiyā ekībhāvāya saṃvattati.
- 13. ime kho bhikkhave cha sārāṇīyā dhammā piyakaraṇā garukaraṇā saṅgahāya avivādāya sāmaggiyā ekībhāvāya samvattanti.
- **14.** imesam kho bhikkhave channam sārānīyānam dhammānam etam aggam etam saṅgāhikam etam saṃghā-

tanikam yadidam yāyam diṭṭhi ariyā niyyātikā niyyāti takkarassa sammā dukkhakkhayāya. seyyathāpi bhikkhave kūṭāgārassa etam aggam etam saṅgāhakam etam saṃghātanikam yadidam kūṭam, evameva kho bhikkhave imesam channam sārāṇīyānam dhammānam etam aggam etam saṅgāhikam etam saṃghātanikam yadidam yāyam diṭṭhi ariyā niyyānikā niyyāti takkarassa sammā dukkhakkhayāya.

- **15.** kathañca bhikkhave yāyaṃ diṭṭhi ariyā niyyānikā niyyāti takkarassa sammā dukkhakkhayāya?
- 16. idha bhikkhave bhikkhu araññagato vā rukkhamūlagato vā suññāgāragato vā iti paṭisañcikkhati: atthi nu kho me taṃ pariyuṭṭhānaṃ ajjhattaṃ appahīnaṃ yenāhaṃ pariyuṭṭhānena pariyuṭṭhitacitto yathābhūtaṃ na jāneyyaṃ na passeyyanti.
- 17. "sace bhikkhave bhikkhu kāmarāga pariyuṭṭhito hoti, pariyuṭṭhitacitto'va hoti. sace bhikkhave bhikkhu byāpādapariyuṭṭhito hoti, pariyuṭṭhitacitto'va hoti. sace bhikkhave bhikkhu thīnamiddhapariyuṭṭhito hoti, pariyuṭṭhitacitto'va hoti. sace bhikkhave bhikkhu uddhaccakukkuccapariyuṭṭhito hoti, pariyuṭṭhitacitto'va hoti. sace bhikkhave bhikkhu vicikicchāpariyuṭṭhito hoti, pariyuṭṭhitacitto'va hoti. sace bhikkhave bhikkhu idhalokacintāya pasuto hoti, pariyuṭṭhitacitto'va

pts page 323

bjt page 758

hoti. sace bhikkhave bhikkhu paralokacintāya pasuto hoti, pariyuṭṭhitacitto'va hoti. sace bhikkhave bhikkhu bhaṇḍanajāto kalahajāto vivādāpanno aññamaññaṃ¹ mukhasattīhi vitudanto viharati, pariyuṭṭhitacitto'va hoti."

- 18. so evam pajānāti: natthi kho me tam pariyuṭṭhānam ajjhattam appahīnam yenāham pariyuṭṭhānena pariyuṭṭhitacitto yathābhūtam na jāneyyam na passeyyam. suppaṇihitam me mānasam saccānam bodhāyāti. idamassa paṭhamam ñāṇam adhigatam hoti ariyam lokuttaram asādhāraṇam puthujjanehi.
- 19. puna ca paraṃ bhikkhave ariyasāvako iti paṭisañ-cikkhati: imaṃ nu kho ahaṃ diṭṭhiṃ āsevanto bhāvento bahulīkaronto labhāmi paccattaṃ samathaṃ, labhāmi paccattaṃ nibbuti'nti. so evaṃ pajānāti: imaṃ kho ahaṃ diṭṭhiṃ āsevanto bhāvento bahulīkaronto labhāmi paccattaṃ samathaṃ, labhāmi paccattaṃ nibbuti'nti. idamassa dutiyaṃ ñāṇaṃ adhigataṃ hoti ariyaṃ lokuttaraṃ asādhāraṇaṃ puthujjanehi.
- **20.** puna ca param bhikkhave ariyasāvako iti paṭisañ-cikkhati: yathārūpāyāham diṭṭhiyā samannāgato, at-thi nu kho ito bahiddhā añño samano vā brāhmaṇo vā tathārūpāya diṭṭhiyā samannāgato'ti. so evam pa-jānāti: yathārūpāyāham diṭṭhiyā samannāgato, natthi

_

¹'aññamaññam' iti (sīmu) potthake ūnam pts page 324

ito bahiddhā añño samaṇo vā brāhmaṇo vā tathārūpāya diṭṭhiyā samannāgato'ti. idamassa tatiyaṃ ñāṇaṃ adhigataṃ hoti ariyaṃ lokuttaraṃ asādhāraṇaṃ puthujjanehi.

- 21. puna ca paraṃ bhikkhave ariyasāvako iti paṭisañ-cikkhati: yathārūpāya dhammatāya diṭṭhisampanno puggalo samannāgato, ahampi tathārūpāya dhammatāya samannāgato'ti.
- 22. "kathaṃrūpāya ca bhikkhave dhammatāya diṭṭhisampanno puggalo samannāgato? dhammatā esā bhikkhave diṭṭhisampannassa puggalassa: kiñcāpi tathārūpim āpattim² āpajjati yathārūpāya āpattiyā uṭṭhānaṃ³ paññāyati, atha kho khippameva satthari vā viññūsu vā sabrahmacārīsu deseti vivarati uttānī⁴ karoti. desetvā vivaritvā uttānī karitvā⁵ āyatiṃ saṃvaraṃ āpajjati. seyyathāpi bhikkhave daharo kumāro mando uttānaseyyako hatthena vā pādena vā aṅgāraṃ akkamitvā khippameva paṭisaṃharati, evameva kho bhikkhave dhammatā esā diṭṭhisampannassa puggalassa: kiñcāpi tathārūpiṃ āpattiṃ āpajjati yathārūpāya āpattiyā uṭṭhānaṃ paññāyati, atha kho naṃ khippameva satthari vā viññūsu vā sabrahmacārīsu deseti vivarati uttānī karoti. desetvā vivaritvā uttānī karitvā āyatiṃ

bjt page 760

²tathārūpiāpattim (si, kanthaci)

³vuṭṭhānaṃ (sī)

⁴uttāniṃ (machasaṃ)

⁵uttānim katvā (machasam); uttānī katvā (syā, pts); uttāni katvā (sī)

saṃvaraṃ āpajjati."

- 23. so evam pajānāti: yathārūpāya dhammatāya diţthisampanno puggalo samannāgato, ahampi tathārūpāya dhammatāya samannāgato'ti. idamassa catuttham ñāṇam adhigatam hoti ariyam lokuttaram asādhāraṇam puthujjanehi.
- **24.** puna ca paraṃ bhikkhave ariyasāvako iti paṭisañ-cikkhati: yathārūpāya dhammatāya diṭṭhisampanno puggalo samannāgato, ahampi tathā rūpāya dhammatāya samannāgato'ti.
- 25. "kathaṃ rūpāya ca bhikkhave dhammatāya diṭṭhisampanno puggalo samannāgato? dhammatā esā bhikkhave diṭṭhisampannassa puggalassa: kiñcāpi yāni tāni sabrahmacārīnaṃ uccāvacāni kiṅkaraṇīyāni, tattha ussukkaṃ āpanno⁶ hoti. atha khvāssa⁷ tibbāpekkhā hoti adhisīlasikkhāya adhicittasikkhāya adhipaññāsikkhāya. seyyathāpi bhikkhave gāvī taruṇavacchā thambañca⁸ ālumpati vacchakañca apavīṇati⁹, evameva kho bhikkhave dhammatā esā diṭṭhisampannassa puggalassa: kiñcāpi yāni tāni sabrahmacārīnaṃ uccāvacāni kiṅkaraṇīyāni tattha ussukkaṃ āpanno hoti. atha

⁶usasukkamāpanno (machasaṃ)

⁷athakhvassa (syā)

⁸dabbañca (machasam)

⁹apacinati (machasam, syā) apacināti (sī, katthaci).

khvāssa tibbāpekkhā hoti adhisīlasikkhāya adhicittasikkhāya adhipaññāsikkhāya."

- 26. so evam pajānāti: yathārūpāya dhammatāya diţthisampanno puggalo samannāgato, ahampi tathārūpāya dhammatāya samannāgato'ti. idamassa pañcamam ñāṇam adhigatam hoti ariyam lokuttaram asādhāraṇam puthujjanehi.
- **27.** puna ca paraṃ bhikkhave ariyasāvako iti paṭisañ-cikkhati: yathārūpāya balatāya diṭṭhisampanno puggalo samannāgato, ahampi tathārūpāya balatāya samannāgato'ti.
- 28. "kathaṃ rūpāya ca bhikkhave balatāya diṭṭhisam-panno puggalo samannāgato? balatā esā bhikkhave diṭṭhisampannassa puggalassa: yaṃ tathāgatappave-dite dhammavinaye desiyamāne aṭṭhikatvā¹⁰ manasi katvā sabbacetaso samannāharitvā ohitasoto dhammaṃ suṇāti."
- 29. so evam pajānāti: yathārūpāya balatāya diṭṭhisampanno puggalo samannāgato, ahampi tathārūpāya balatāya samannāgato'ti. idamassa chaṭṭham ñāṇam adhigatam hoti ariyam lokuttaram asādhāraṇam puthujjanehi.

bjt page 762

pts page 325

¹⁰atthimkatvā (machasam)

- **30.** puna ca paraṃ bhikkhave ariyasāvako iti paṭisañ-cikkhati: yathārūpāya balatāya diṭṭhisampanno puggalo samannāgato, ahampi tathārūpāya balatāya samannāgato'ti.
- 31. "kathaṃ rūpāya ca bhikkhave balatāya diṭṭhisampanno puggalo samannāgato? balatā esā bhikkhave diṭṭhisampannassa puggalassa: yaṃ tathāgatappavedite dhammavinaye desiyamāne labhati atthavedaṃ, labhati dhammavedaṃ, labhati dhammūpasaṃhitaṃ pāmujjaṃ."
- 32. so evam pajānāti: yathārūpāya balatāya diṭṭhi-sampanno puggalo samannāgato, ahampi tathārūpāya balatāya samannāgato'ti. idamassa sattamam ñāṇam adhigatam hoti ariyam lokuttaram asādhāraṇam puthujjanehi.
- **33.** evam sattangasamannāgatassa kho bhikkhave ariyasāvakassa dhammatā susamanniṭṭhā hoti sotāpattiphalasacchikiriyāya. evam sattangasamannāgato kho bhikkhave ariyasāvako sotāpattiphalasamannāgato hotīti.
- **34.** idamavoca bhagavā. attamanā te bhikkhū bhagavato bhāsitam abhinandunti.

pts page 326